

Vun driewerwer

erscheint auf www.lenauheim.de

monatliche
Erscheinung

November 2018

von Helen Alba

E heißes Eise

Doneilich is mer e Schlager vun frieher in de Sinn kumm: „Liebe is e heißes Eise, pack es jo nit ganz fescht an, weil mer sich derbei die Fingre verbrenne kann“! Un weil ich grad an mei Wäsch gedenkt han, die ich biegle muss, han ich mer vorgohol, mol bissl nohzuforsche, wie mer ganz frieher gebiegelt hat. Weil in meim Elternhaus war schon es elektrischi Biegleise, nor die Oma hat in meiner Kindheit noch mitm Kohlebiegleise die Wäsch geglätt. Mer hat ufm Kichetisch gebiegelt, hat e Biegl Tuch ghat (des war e ältri Deck un derdriwert e weißes Tuch). Vor em Biegle is die Wäsch „ingspritzt“ gin, dass se sich leichter biegle losst. Die Mannshose sin mit eem nasse weisse Tuch gebiegelt gin, dass die Falte scheen rauskumme.

Also: In unsrer Vorzeit hat mer die getruckelti Wäschesticker mit große Tierknoche un Steener gerieb, dass se glattich gin. Im zweite Johrhunnert sin die Chinese dann druf kumm, dass mer Stoff mit Wärme eher glattich kriet. Sie han eiserni Phanne mit langem Stiel mit gliehede Kohle gfillt un sin dermit iwer die Wäsch hin un her gstrich.

Erscht im 15. Johrhunnert is es erschti Biegleise ufkumm, es hat sich Blockeise genennt. Des war aus Eise mit eem Holzgriff un hat die Form vun eem Schiffchen ghat. Zum Erhitze sin se uf de Herd gstellt wore. Im 17. Johrhunnert hat mer aus Messing die sogenannte Kasteneise hergestellt, in dem sei Inneres hat mer e heißi eiserni Platte gschob. Mer hat meh solchi Platten im Herdfeier erhitzt, die dann immer gewechselt gin sin. Es Sprichwort „Mehreri Eise im Feier han“ is entstann.

Erscht Ende des 19. Johrhunnerts is dann es Kohlebiegleise ufkumm un 1882 es elektrischi. 1950 is dann es Dampfbiegleise erfunn wore. Heitzutach gits die „Dampfbieglstation mit automatischer Temperaturanpassung“. Mer hat e Biegl Tisch derbei, ja so ännre sich die Zeite!

Kupfre vun gischer un heit

Vor langer Zeit han unser Schwowe aus Weide gflecht, Holz- oder Pappedeckl-Kupfre ghat. Vor was se eigentlich e Kupfer gebraucht han? Do derdriwert han ich nohgedenkt. Wahrscheinlich sin unser Schwowe anfangs 1900 jo wenschtens mit eem Kupfer uf Amerika ausgewannert, um dort Arweit zu finne. De Holzkupfer war for die Rekrute bstimmt, wann se ingerickt sin. Un sicher sin die Baure ach mit Kupfre ins Bad gefahr.

Doch die meischte Kupfre sin kaaft gin, wie unser Leit anfang han dran zu denke, uf Deitschland zu gehn. Sie han zwar gsaat, dass se Lederkupfre mit Rieme un Schnalle erstann han, doch sicher ware die aus Kunschtmaterial. Un dann sin se weg. Mit Kische un Kupfre. Sie han dorte alles Meeglich drin verstaut: Gscherr, Bettsach, Heilichebilder un natierlich Gwand. Ich erinnere mich, wie des war, wie mei Familie weg is. Es is ganz vill inkaaft gin for mitholle. Beim Dorschneider han se sich Kostiemer, Anzich, Frujohrs- un Wintermäntel aus teirem Stoff nähe gelosst.

Un was war dann? Wie se in dem Deitschland Fuß gfasst han, wie mol ihre Rente un de Lastenausgleich kumm war, han se jo bemerkt, dass se in ihrem Gwand vun de anre Leit absteche. Un han des Mitgholni wieder scheen in die „Lederkupfre“ verstaut, weil se sich anri Klamotte kaaft han, „for dass se de Leit gleiche“. Un die Kupfre sin der Reih noh zuruck zu uns geschickt gin. Voll mit neijem Gwand, des wu niemols getraa is wore. Ja, awer ach do bei uns war des ufmol nimi gut genuch, weil inzwische schon e anri Modi ufkumm is. Wegwerfe han mer doch nix wille, also han mer massenhaft Gwand an armi Leit verschenkt, samt de Kupfre. Weil ach die Kupfermodi hat Welle geschlaa. Mer is mit Trollre gereist, die han Räder un e Häng ghat, mer hat se nohziehe kenne un hat nimi schlepe misse.

Ich erinnere mich ans Jahr 1991, selmols sin mer erschtmols uf Deitschland gefahr. Mitm Zug. Iwer Budapest, Prag. In eem Kupfer han mer unser Gwand ghat. Un der anri....

In Kurtitsch sin die Grenzer zur Kuntrool kumm. Selmols sin vill Leit weger Bischnitz uf Ungarn gefahr. Die han se ganz grindlich unersucht. Manchi han sogar drei Trainingsanziech, eener iwer em anre, anghat. Dann han se haufeweis Zigarette verstopfelt ghat, froot mich jo nit wu...

Dann war unser Reih. De Grenzer schaut sich im Abteel um, gsieht owe im Gepäckträger e ganz große pappedeckelne Kupfer un saat: „Runner dermit un ufmache“! Mit eem Schwung hat mei Mann de Kupfer runnerghol, ufgemacht. Drin war sei Pelzkapp, weiter nix. Alli han lache misse. Mir han de Kupfer mitghol, weil mer halt vill han inkaafe wille!